

靈邱縣補志第四卷之九

藝文志

志有藝文或以傳事或以傳人以故佳文美賦
無關政要者每不錄載以嚴志例也邑屬邊壤
地處山僻素來文微獻邈雖間有殘碑斷簡亦
半多泯滅無存至於賢儒傳集又復素來未有
其他詩詞歌賦雖有一二可採亦均無關政要
文獻之闕而無徵於邑爲甚茲於古廟頽亭舊
紳老吏一一搜求詢訪僅得碑記數宗用以採

而錄之以傳事蹟並附以題詠數章而彰人物

增修龍興寺碑記

趙漢譔

明進士
代州人

龍興古上刹也其山水秀甲他方惟叢林首稱勝概者必先焉肇自前代長城百里許規模引遠制度壯麗仰而高峯嵐疊翠林木陰翳珍禽調舌奇獸奔蹄俯而卑嶺湍滌洄光影交燦笙鳴簫鼓沉璧耀金蓋天作而地藏之以遺其人故中之巍然而崛起者正殿也翼然而相嚮者兩廊也殿之後有僧廊之介有堂崇臺峻階濃粧豔采允矣福地洞天超塵絕俗若夫風清月白之宵樂音遠邇燈火上下幽人墨客多

所往來娛遊而不知息僧衆舉動亦異於常誠佳境也歲久易湮不無頽腐垣壁之脫落棟宇之摧折暴儀像於風雨委爐篆於塵泥行道嗟傷僧徒悲感非力量之弘道業之盛弗克有以起之也厯其顛末邇其沿革重修自我朝者洪武三年乃厥初也其僧不可得而詳逮至正統八年寺復淪毀時則有僧淨善淨信淨深淨昌奮而作之鼎然一新綿綿延延及於成化念一載因其缺補本其無創則僧道通焉薨傾洞顛復越數十禩矣正德庚午僧德岩慨治理久廢

悼廟貌失常肅將一心動感衆善捐金施兩誕肆營
造由殿而廊金碧輝煌簷牙高啄極一時之美觀聳
十方之瞻仰然而未備者則天王殿鍾鼓樓也岩則
倡而完之集材鳩工不日而成自外及內潔然整飭
凡有諸耆自不覺其敬謹之中生矣閱歷滋遠變易
罔定設無尺碑寸碣以紀之則美於前者或不能傳
於後由是僧道才礱石基隅迹其既往悉其今來具
載手卷爰托予友聽選監生段續以求紀於予且道
才之行綽有祖風予亦嘉其計深視徒取目前而忘

意遠大者天淵矣其有功於浮屠者豈小補哉嗚呼
彼可謂知重其道者矣惜乎無以吾儒之所謂道者
語之則未免惑於一偏使彼而知吾之道則將祝翊
皇圖篤厚根本以猶諸人也奚足異哉後有覩於斯
者必以吾言爲是也而才之續亦不貶也謹記

重修龍泉寺並龍王廟碑記

李金臺撰

邑舉人

嘗謂地之靈也每借神之靈以爲靈靈邱爲古成州地高山大澤古刹梵宮其足以壯一邑之色而動萬世仰止之思者何可勝道乃考諸邑志載有八景惟龍泉寺獨據城北之勝山不高而秀水不深而明時見草木暢茂鳥鵲飛鳴猗歟休哉誠一邑之大觀也夫有其名者必紀其實此寺先有龍王廟廟後有泉名龍泉又建寺名龍泉寺詎意代遠年湮寺廟傾頽徒有名而無實此有心者所爲厯其地而嘆惜也爰

是衆善人等捐資修葺重修佛殿三楹又重修龍王廟一所以及各廟彩粧補葺未及數月工已告成但見棟宇輝煌廟貌森列兼之山水相應林木交羅靈邑熙皞之象豐年之兆基於此矣余於己亥冬嘗過其地瞻仰之餘見其道路盤曲水聲潺湲峻宇雕牆輝光奪目知先王神道設教衆人一念之善感卽神之爲靈昭昭也工竣衆善等時以記相囑余愧不能文但以有善必彰今日之樂善好施用以垂鑑於後之嗣而葺之者故以是爲永傳不朽云

重修東嶽廟碑記

丁勗撰

邑貢生

靈邑舊有東嶽廟在城東里許高踞平巒巍然挺出
簷牙高啄瓦縫參差刻桷丹楹萬象森列飛閣朝霞
相爲激射晚鍾風勢互出低昂每歲九月商賈輻輳
士庶肩摩又值秋穫之時粟帛相易農耒相資九日
而畢一時之盛典與六月會頡頏然歷年旣多風蝕
雨摧墻傾堦圯而且二三襄事棲息無所瞻拜之下
罔不盡傷心邑尉彭公慨然自任今歲暮春哉生魄
乃率邑人廣行捐助衆善樂輸庶工丕作

俾乃有終高其墻垣丹其棖題翠黛頰黃燠然火日
復構屋九間以召居人以棲糾首是不可以無記夫
泰山之神季氏尙不得旅况士庶乎卽諸侯亦止祭
本地之山未有兼及者也然嘗臆揣之或亦有說焉
嵩高維嶽生甫及申泰山巖巖乃誕宣聖又况登東
山而小魯登泰山而小天下高山仰止景行行止其
猶存甘棠之意乎抑亦以泰山爲五嶽之尊東方物
所始生其亦有報本之思乎而且凡東謁者亦止洮
頰水拜稽首以寄遙尊之意非有犧牲粢盛則不得

謂之旅也明甚然則徧屬紳士越及兆民曷其奈何
弗敬若夫施雨行雲或在本土金匱玉策言復近誕
茲不敢瀆陳云

重修鄧峯寺碑記

賀裕譔

嶧縣舉人

大淵獻之九日靈邑東河南重修鄧峯寺成都人士
携壺挈榼邀往登高余見羣峯環匝如花湧青蓮中
隱琳宮居然蓮瓣抱蕙迨夫心燈照慧月明風吹梵
唄響答松聲令人塵緣解脫印證三生明經呂東陽
武孝廉盧映斗顧余言曰此邑八景之一也昔有高
僧卓錫聞空中天樂隱隱西去謂弟子曰佛去矣大
劫將至可速移居俄地震山合寺遂陷樵蘇輩疊石
爲龕未忘也因復構蘭若焉邑人鄧雲峯過此又聞

天樂西來曰佛至矣與女弟學菩提面壁蒲團坐破
化於山頭寺因得名此特父老相傳究未知創於何
代雖山僧耕得斷碣或遼或明皆屬重修邇來緇流
失守幾蔓荆榛仗佛力募得二百餘緡更腐瓦易
敗椽粉殘垣蘄蝕桷左翼龍宮傾隤因舊址重建二
楹餘百緡爲僧置產作香火資非敢云好善也但願
焚誦有托焉耳請爲文誌其事余謂聖賢垂訓上講
身心庸碌無知偏信因果自金人入夢聲宣震旦象
教之設大有功於儒道焉觀其燋花罪葉慘墮泥犁

寶珞球幢幢登蓮舛愚夫婦之勸善懲惡其效倍捷
於詩書所以推孔子爲儒童菩薩請住涅槃稱釋氏
爲天竺先生權司函丈使先師若晤瞿曇歡美當更
在猶龍之上閭徵君之言豈無所見抑又聞之林疎
則鸞鳳不巢水淺則蛟龍不育培脉補氣所關非細
得此修飾亦所以助地靈而興人傑也豈徒金碧輝
煌爲暇日遊觀計哉至若踵而修之無爲狐兔藪無
爲樵牧場是有望於將來

創建太白書院碑記

邑令何瞻湯

自會垣以及各州府縣莫不有書院之設以振興文教而靈邑獨缺予初下車卽慨然引爲已任而未之逮也洎己亥閱舊卷有裁汰叅府衙署故基並圍地二畝有餘經前任任公變價歸公諸紳呈請改建書院在案然寢而未舉予親閱其基址在城內東偏太白聳翠於前貓峯插峙於後左右山環水繞一邑勝概在是可爲建書院之區矣但荒蕪殘廢僅存中堂三間後宅三間大門三間餘俱坍塌殆盡謀諸紳士